

LIS PREDICJIS DAL MUINI

di pre Josef Marchet - Udin, 1965

Cjalt e frêt

Doman in cheste glesie ni messe ni gjespui. Pre Scjefin al à di vê cjapade une ponte e al è tal jet. E je bielzà la seconde volte che al cjape alc chest an, che Diu nus vuardi di mâl!

Sintît mo, ancje cheste: par vie de stuie che o pensavi di meti in glesie, no si po cumbinâ nuie: al jere di dûlu! Zuan Cinise al mi à dit che lui nol sa ce che al è frêt: se al sint un sgrisul, al pare jù un bussul di sgnape e al à la stue tal stomi; 'Sef Cjanorie al mi à dit che lui nol à mai vudis stuis nancje in cjase e no si è mai glaçât il nâs; Toni dal Cuel al mi à dit che se in glesie e je masse criure e lis mans si imbramissin, lui lis freole magari fintremai che si scusse lis àinis; Meni Pirule al à declarât che i lens a costin e che lui si scjalde tal so fogolâr; gno cusin Masut al mi à spiegât che là di Baduscli nol è mai frêt; Taresie la Molene mi à fate une predicje di mieze ore par fâmi compendi che stuis in glesie no si 'nd à mai viodudis dopo che il mont al è mont e che nol covente fâ novitâts... In sumis, lens in glesie nissun vûl puartant. E alore nuie. Jo o fasevi par voaltris; par cont gno, mi pari: o met cheste stiriane, un biel pâr di dalminis di pôl, specialitât de dite, e no ai pôre plui. O fasevi dome par voaltris. E scusaitmi tant...

Ma o ai simpri tal casselin dal amâr chês cuatri cjartis di mil che mi son rivadis za dîs de Americhe; o varès pensât di cjoli un argagn di sunâ in timp des funzions. Vêso viodût chel casselot che a vevin menât sù i cjantôrs de vile di 'Sot, la domenie dopo Nadâl, par compagnâ la messe grande? Sul plui biel, che a cjantavin il Credo, al si è rot un sfuei e, par tant che il sunadôr al menàs sot vie chês uniche cjarcule che e funzionave, a vignivin fûr dal imprest nome vuacadis di cjan... E la cjantorie, cence compagnament, e je lade indenant a fuarce di stechis che al jere un disio. O ai cjapadis informazions e o calcoli, sul afâr de spese, di rivâ dongje: se mi ves di mancjà alc, o provarai a lâ a bati casse dulà che o sai jo. No di voaltris, stait sigûrs. Oh mo! Chest an o vin culî un mestri di scuele gnûf, che al è rivât chês altre setemane, e che al è un fregul di man cun chei imprescj. Lui al sarès content, in chestis seris di Unvier, di tirâ dongje un pôcs di fruts o cualchi fantaçute e insegnâur a cjantâ cualchi robute; e in timp di messe al podarès compagnâju.

A mi no mi displasarès fregul, ancje par vie che se culî, cualchi volte si prove a cjantâ alc, cun chês gosatis che o vês, al è un spavent. O disevi tra di me, za dîs minûts, intant che o cjantavin lis litaniis dal Rosari... Pasche de Roste, alî, mi pareve une cheche cun chês splendare di vês che e mole fûr; mê

comari 'Sese e tacave sot prin di chei altris e po e finive dopo di ducj; Mine la Bocjute cu la intonazion e lave pe sô strade di bessole; mê gnece Lidie dal Fôr e faseve il riçot sul orapronobis tant che e ves cjantât il "massolin di fiori"; chês altris dôs polecis là jù da pît a sberghelavin come se a fossin stadis inte fabriche di Glemone; e Checusse, là vie, i dave sot ogni tant cuntune murungulade che al pareve il liron di Siôr Bortul. O ai fintremai alçât i vôi, a viodi se i agnui piturâts sul cuadri dal altâr si taponavin lis orellis! Nancje tal baracon des bestiis salvadiis, che al ven a Udin tal Zardin Grant pe sagre di Sante Catarine, no si sint une orchestre di chês fate!

Sechel siorut, che o disevi, al à buine volontât di insegnâ a butâ fûr la vôs cuntun fregul di gracie, almancul ae zoventût, al fâs une opare buine: e chei altris che a tasin, cun chei gargats sfondrâts, tant che trombis di coce. E cun cheste us doi la buine sere.